



DUSCHUURLI

PFYFFERCLIQUE BASEL
Gründigsjoor: 1983

Adie Finferli

Ojee, ojee, ojeeminee.
Hämmer jetzt bald s letschte gsee?
Gits das Goldstick scho bald nimme
im schweere Pulver-Seggel inne?
S Finferli sell also go
und gar nimmi widerko.

Liebi Kinder, s duet is laid
und nimmt au uns e bitzli d Fraid,
sone Batze Eich denn z schängge
und in Eier Kässli z längge.
Goldig glänzt hets und guet deent,
bim Yynefalle s Sagggäld gscheent.

Drum do fir all die Kinderhärze:
eppis mindre ka die Schmärze
und s ka dr Glai ins Gumpe grote,
schänggt me denn als Gäld e Note.

Swissmint maint, es sig nit schlimm,
gäbs unseri glainschti Minze nimm.
Denn bim Yykauf kenn me runde,
meglig sig das au nach unde.
Und Kupfer-Aluminium-Nickel
schaadi dr Hut und gäbi Pickel.

Statt em Batze und em Weggli
sig hyt Gmies im Znyyniseggli.
Zue dyyr sig die Minze au,
drum sigis kinfzig au nit schlau
und scho gar nit käms denn glääge,
e sone Mini-Finifer z prääge.

Aber stimme die Bedängge
oder kame sich die schängge?
Unsere aige Tescht het zeigt,
dass me meischtens derzue neigt,
das wo sich bewäärt het z bhalte
und au bim Minz blybts so bim Alte.

Numme schlächt isch das jo nit,
wie unsere Gäldwäschtescht ergit.
Vergässe in de Jeans ischs gange:
dr Batze isch nit blybe hange,
isch uuseko grad fascht wie ney,
goldig glänzig, ooni Bley,
richtig zem Verschängge blangg
und ooni Spuure, Gott sei Dangg.

Em goldig Finiferli zer Eer
mache mir dr Fasnachtskeer,
indäm mir s Finiferli dien fyyre
und Vyyli hoffentlig dien spyyre:
mitte in dr Plastikwält
goots do no um richtigs Gäld.

Drum liebe Bundesroot in Bärn,
gäll Dir ligt wie uns daas färn,
ibers Finiferli go z richte
und sogar denn druff z verzichte.
Fir aimol schyynts doch besser ds sy,
no z warte und nit ds schiesse dry.
Mir fiere frindlig gmaint ins Fäld:
d Zyt wird so au do ze Gäld.